

觀佛三昧
海經

卷六

百八十八
覆六

48647



元祿九年丙子二月日重修

皇圖永固 帝階級昌

佛日增輝 轉輪常轉

山城州天安寺法金剛院置



佛說觀佛三昧海經卷第六

東晉天竺三藏法師佛陀跋陀羅譯

觀四無量品第五

尔時世尊說是語時佛神力故十種白光從
佛心出其光遍照十方世界一一光中無量
化佛乘寶蓮華時會大眾見佛光明如頗梨
水或見如乳見諸化佛從佛胸出入於佛齋
遊佛心間乘大寶船經往五道受罪人所一
一罪人見諸化佛如已父母善友所親漸漸
為說出世間法是時空中有大音聲告諸大
眾汝等今者應觀佛心諸佛心者是大慈也
大慈所緣緣苦眾生佛告阿難云何名慈心



慈心者應當繫念緣苦衆生苦衆生者謂三
惡道極苦惱者佛說是語時會大衆見於地
獄餓鬼畜生解脫相三昧力故令諸衆生自
識宿命見受苦者皆是前世無量劫中父母
師徒諸善親友見已啼泣為佛作禮白言世
尊我等今者因佛力故見苦衆生悉是我等
父母師長佛告大衆三界衆生輪迴六趣如
旋火輪或為父母兄弟宗親三界一切無不
是汝所親之者云何起意生殺嫉心作是語
已淨飯王等一切大衆白佛言世尊云何名
為慈心三昧惟願世尊為我略說佛告大衆
夫慈心者應當起想先緣所親繫念之時念

己父母受諸苦惱有不孝者念己妻子所愛
衆生受諸苦惱有見衆生癩病癰瘡見已作
念當云何救一想成已應作二想二想成已
應作三想三想成已滿一室想一室想成已滿
於僧坊一僧坊成已滿一由旬一由旬成已
滿一閻浮提閻浮提成已滿弗婆提弗婆提
成已滿三天下如是漸廣滿十方界見東方
衆生盡是其父見西方衆生悉是其母見南
方衆生悉是其兄見北方衆生悉是其弟見
下方衆生悉是妻子見上方衆生悉是師長
其餘四維悉是沙門婆羅門等見是衆生皆
受苦惱或遇重病或見在於刀山劍樹火車

爐炭一切苦事見已悲泣欲拔其苦自作我想乘寶蓮華詣諸人所調身按摩為洗癩瘡見地獄火憂悲雨淚欲滅其火見諸餓鬼刺身出血化作乳想供給餓鬼令得飽滿既飽滿已為其說法讚佛讚法讚比丘僧作是讚已益更憂悲心無暫捨如是慈心極令通利事事廣說如慈三昧如是慈心名習慈者既習慈已次當行悲悲者見受眾苦如箭入心如破眼目心極悲苦遍體兩血欲拔彼苦如此悲者有百億門廣說如大悲三昧行慈悲已次行大喜見諸眾生安隱受樂心生歡喜如已無異既生喜已次行捨法是諸眾生無

來去相從心想生心想生者因緣和合假名
為心如此心想猶如狂華從顛倒起苦從想
起樂從想生心如芭蕉中無堅實廣說如經
十譬作是觀時不見身心見一切法同如實
性故名菩薩身受心法依因此法廣修三十
七助菩提分若取證者是聲聞法不取證者
是菩薩法作是語已佛心光明益更明顯從
佛心端諸光明中生諸寶華一一寶華恒沙
寶華以為眷屬一一華上無量無邊微妙化
佛方身丈六如釋迦文此相現時佛身毛孔
八萬四千諸寶蓮華一一華上八萬四千諸
大化佛身無量無邊如是化佛身諸毛孔及

心光明亦如向說如是光明照十方已從佛頂入從佛眉間白毫相出從白毫出遍照十方猶如金幢令十方地作真金色卷諸化佛入佛口中從佛口出亦照十方來入佛曾從佛曾出復照十方來入佛齋此光入時佛身之內如瑠璃冰澄清不動三界五道一切衆生映現佛心見諸化佛乘大寶臺猶如寶船遊佛心間一一化佛讚說不殺讚歎念佛讚歎念法讚歎念僧讚歎念戒讚歎念施讚歎念天讚六和敬讚慈三昧如此六念能生善法此六念者是諸佛因佛心者是六念心因六和敬而得此法欲成佛道當學佛心說是

語已如來身光倍更明顯佛身化佛及寶蓮
華數不可知一一華光如雜華說如是觀者
名為正觀若異觀者名為邪觀佛滅度後佛
諸弟子修六念者名念佛心念佛心者除十
二億劫生死之罪作是觀者生生之處終不
邪見心不僻謬恒得值遇無生菩薩如是之
人若生邊地無佛法處念佛功力自然悟解
成辟支佛尔時世尊說是語已還攝身光如
本無異佛告父王如大人相白毫光明及一
切相有能逆觀順觀分別觀者全觀圓光及
丈六者但發是心如見不見除却衆罪如向
所說設有施主具五神通得如意珠飛遍十

方十方世界一一世界衆生之數不可得知
但以無量無邊物爲其數如是衆生皆是羅
漢是大施主盡筭數劫供養賢聖四事無乏
是人得福寧爲多不父王白言但使供養一
方羅漢得福無量何況十方無量羅漢佛告
父王正使有人成熟邪見衆生數如上說皆
令彼人得羅漢道三明六通具八解脫不如
發心趣向佛慧念佛須臾佛說是語時釋子
衆中一億釋子發阿耨多羅三藐三菩提心
自誓不求聲聞辟支佛道白佛言世尊諸佛
身分乃至一毛無量化佛諸聲聞身如焦敗
種爲何所益

觀佛三昧海經觀四威儀品第六

尔時世尊於大眾中即便起行足步虛空父
王觀見心甚歡喜亦隨佛行佛舉足時足下
千輻輪相一一輪相皆兩八萬四千眾寶蓮
華一一蓮華復化八萬四千億那由他華一
一蓮華化爲一臺一一華臺一一華葉遍覆
十方無量世界一一蓮華八萬四千葉釋迦
牟尼足步虛空悉兩寶華如是眾華復有無
量微塵數佛足步虛空父王見已心大歡喜
得阿那含五體投地爲佛作禮時會大眾皆
覩此事白佛言世尊十方世界無數化佛何
者真佛誰是化佛佛告大眾諸佛如來入空

寂處解脫三昧隨意自在無有真化所以者
何佛心空寂復入空寂解脫光明王三昧此
定力故諸佛如來化無邊身無邊身者是薩
婆若薩婆若者名無著三昧無著三昧故如
來現行若現乞食若或經行如是二法饒益
衆生若有衆生佛在世時見佛行者步步之
中見千輻輪相除却千劫極重惡罪佛去世
後三昧正受想佛行者亦除千劫極重惡業
雖不想行見佛跡者見像行者步步亦除千
劫極重惡業佛告阿難汝從今日持如來語
遍告弟子佛滅度後造好形像令身相足亦
作無量化佛色像及通身光及畫佛跡以微

妙絲及頗梨珠安白毫處令諸衆生得見是相但見此相心生歡喜此人除却百億那由他恒河沙劫生死之罪說此語已如來還坐父王復問佛出世間有何利事能令衆生得安樂耶今時世尊告大王言舍衛城中須達長者有一老母名毗佉羅謹勤家業長者勅使手執庫鑰出內取與一切委之須達長者請佛及僧供給所須時病比丘多所求索老母慳貪瞋嫌佛法及與衆僧而作是言我家長者愚癡迷惑受沙門術是諸乞士多求無厭何道之有作是語已復發惡願何時當得不聞佛名不聞法名不見剃髮染衣之人如

是惡聲一人聞已復聞二人展轉遍滿舍衛
城中末利夫人聞此語已而作是言云何須
達如好蓮華人所樂見云何復有毒蛇護之
作是語已勅須達言遣汝婦來吾欲與語阿
那邠坵馳詣王宮到作禮畢却住一面末利
夫人命令就坐坐已語言汝家老婢惡口誹
謗何不驅擯阿那邠坵跪曰夫人佛日出世
之所潤益鴛鴦掘摩羅大惡之人足提賤人氣
噓梅陀羅佛能調伏何況老婢而不能調末
利夫人聞是語已心大歡喜我欲請佛汝遣
婢來明日食時請佛及僧於宮供養長者遣
婢持滿瓶金摩尼珠蓋勸助王家供養衆僧

告言可往汝持此物貢上王家婢聞是語歡
喜踊躍持寶瓶走末利夫人見彼婢來此邪
見人佛當教化我見此人受化之時必獲法
利今時世尊從正門入難陀在左阿難在右
羅睺羅在佛後老母見佛心驚毛豎可惡此
人隨我後至即時欲退從狗竇出狗竇即閉

四方小巷一時閉塞惟正路開老母覆面以
扇自障不喜見佛佛在其前令扇如鏡無所
障礙迴頭東視東方有佛南視南方有佛西
視西方有佛北視北方有佛舉頭仰看上方
有佛佞頭伏地地化爲佛以手覆面時手十
指皆化爲佛老母閉目心眼即開見虛空中

一切化佛滿十方界此相現時舍衛城中有
二十五梅陀羅女五十婆羅門女及諸雜類
并末利夫人宮中合五百女心生誹謗不信
佛法見佛如來足步虛空爲於老母現無數
身心大歡喜裂邪見網頭腦頂禮世尊足下
今時世尊以梵音聲安慰諸女告言法女汝
今可稱釋迦牟尼稱我名故觀我身相可得
解脫作是語已諸女同聲稱南無佛佛放眉
間白毫相光照諸女心女見佛行威儀庠序
足下雨華猶如華蓋化佛如林不可稱計諸
女見已發阿耨多羅三藐三菩提心老母見
佛邪見不信猶能除却八十萬億劫生死之

罪況復善意恭敬禮拜。今時老母以得見佛，
巷陌還開疾走歸家。白大家言我於今日遇
大惡對沙門瞿曇在王宮門多衆之前作諸
妖幻身如金山衆華映飾，目踰青蓮有萬億
光不可具見。沙門善幻世間無比，大家年少
可不喜見。作是語已入木籠中，以百張皮覆
木籠上。白氎纏頭却卧闇處。今時世尊還祇
陀林末利夫人白言：世尊願化邪女，莫還精
舍。佛告末利：此女罪重於佛，無緣於羅睺羅。
有大因緣。佛今日行爲其除罪，作是語已即
還精舍。告羅睺羅：汝詣須達大長者家，度惡
老母。作是語時，千二百五十沙門皆作是言。

我等今日願欲隨從。今時羅雲承佛威神入
如意定禮拜。既畢遶佛七匝。即自化身作轉
輪聖王。阿難侍左。難陀侍右。千二百五十比
丘。化爲千子。阿難爲典。藏臣難陀爲主。兵臣
七寶四兵。皆悉具足。時金輪寶在虛空中。乘
蓮華臺。徑往須達大長者家。夜叉唱言。聖王
出世。僂諸惡人。宣揚善法。老母聞已。心大歡
喜。聖王出世。有如意珠。無所求索。此當可言。
今時聖王。搥鍾鳴鼓。乘大寶輦。至須達家。老
母見已。甚大歡喜。聖王出世。多所潤益。識別
善惡。必當不爲沙門所惑。從木籠出。敬禮聖
王。聖王即遣主寶藏臣。往至女所。告言。姊妹

汝宿有福應王者相聖王今者欲以姊妹為
玉女寶老母白言我身卑賤猶如糞穢聖王
顧問喜慶無量何所堪任應玉女寶若見念
者勅我大家放我令脫所賜已多尔時聖王
告須達言卿家老女衆相巍巍吾今欲以充
玉女寶須達白言惟命是從願上大王老婢
聞放喜悅非恒聖王即便以如意珠照耀女
面令女自見如玉女寶倍大歡喜而作是言
諸沙門等高談大語自言有道無一効驗聖
王出世弘利處多令我老弊如玉女寶作是
語已五體投地禮於聖王時典藏臣宣王教
令揚十善法女聞十善心大歡喜即作是言

聖王所說義無不善為王作禮悔過自責心
既調伏時羅睺羅還復本身老母舉頭見千
二百五十比丘即作此言佛法清淨不捨衆
生如我弊惡猶尚化度作是語已求受五戒
時羅睺羅為說三歸受五戒法母聞此法未
舉頭頃成須陀洹地神歡喜從地涌出告須
達言善哉長者裂邪見網如來出世正為此
耳時羅睺羅將此老母詣祇陀林到已見佛
身相紫金色歡喜合掌為佛作禮懺悔前罪
求佛出家佛告羅雲汝將此母詣憍曇彌末
至中間羅雲為說苦空非常無我等法老母
聞已頭髮自落成比丘尼三明六通具八解

脫身昇虛空作十八變波斯匿王末利夫人
見此變化心大歡喜善哉佛日出現世間破
無明闇能令邪見得應真道作是語已為佛
作禮白言世尊如此老母宿有何罪生卑賤
處為人婢使復何福慶值遇世尊如好白蠱
易受染色應時即得阿羅漢道佛告大王諦
聽諦聽善思念之如來為王分別解說過去
久遠無數劫時有佛世尊名一寶蓋燈王如
來十号具足彼佛滅後於像法中有王名曰
雜寶華光其王有子名曰快見求欲出家父
即聽許王子詣山到僧坊中求欲出家時有
比丘聰明多智深解實相受為弟子復有比

丘名德華光善說法要誘進初學王子比丘
雖復出家猶懷憍慢和上為說甚深妙法般
若波羅蜜大空之義王子聞已謬解邪說比
丘滅後即作此言我大和上空無智慧但能
讚歎虛無空事願我後生不樂見也我阿闍
梨智慧辯才願於生生為善知識王子比丘
作是語已法說非法非法說法教諸徒眾皆
行邪見雖持禁戒威儀不缺以謬解故命終
之後如射箭頃墮阿鼻獄八十億劫恒受苦
惱罪畢乃出為貧賤人五百身中聾癡無目
千二百身恒為人婢佛說是時末利夫人有
五百婢懺悔自責發菩提心願於來世解深

空法佛告大王。尔時和上者。今我身是阿闍梨者。今羅睺羅是王子。比丘此老母是徒衆弟子。今日邪見女等發菩提心者。是佛說此時。舍衛城中二萬優婆塞發菩提心。得念佛定。常於定中見佛說法。佛告父王。邪見惡人見佛行時。尚得如此無量福德。何況觀佛行及像行者。父王白佛。佛母摩耶生忉利天。佛今光相神通具足。去何當往。爲母說法。佛告大王。如來當如轉輪聖王。足行之法。從閻浮提上忉利天。問訊檀越。爲說妙法。尔時會中有菩薩摩訶薩。名曰持地。即從座起。入首楞嚴三昧。三昧力故。從金剛際。金剛爲輪。金剛

爲根金剛爲華華華相次出閻浮提時四龍
王難陀跋難陀阿耨達多婆伽羅龍王等各
持七寶詣持地所奉上七寶爲佛世尊作三
道寶階左白銀右頗梨中黃金從閻浮提金
剛地際上忉利宮一一寶階七重欄楯是諸
欄楯百億寶成百億光明一一光明百億寶
華一一華中無量樂器自然涌出尔時持地
以恒河沙七寶蓮華鋪佛蹈處於階道側豎
諸寶幢無量寶幡懸其幢頭百億寶蓋彌覆
其上忉利諸天雨曼陀羅華摩訶曼陀羅華
曼殊沙華摩訶曼殊沙華嚴飾其間時梵天
王手擎香鑪與万梵俱侍立階側一一香烟

如瑠璃雲彌滿虛空於其雲中百千伎樂不
鼓自鳴難陀龍等持海此岸栴檀末香漫散
道中香光上出如金光焰高一多羅樹化爲
金臺無量諸天持天瓔珞嚴飾階道如是供
具不可稱計卽時卽尊於閻浮提執持三衣
告勅阿難難陀羅睺羅等五百比丘足步大
地始舉足時地六種動下足之時地生寶宮
如梵王宮宮宮相次懸在空中隨映佛後在
階道側持地菩薩并弥勒等一千菩薩一時
合掌以萬億音歌詠如來無量德行卽時梵
王無數百千諸梵天等手擎香鑪無量伎樂
以供養佛立侍左階釋提桓因無數天子百

千天女鼓樂絃歌亦立左階無數聲聞菩薩
大衆侍立右階尔時世尊放大光明照階道
邊其光如雲百千億色猶如重閣佛處其中
八萬四千化佛圍遶五百分身諸佛與佛正
等執持衣鉢威儀庠序分身諸佛亦有阿難
難陀以爲侍者時魔波旬於虛空中與諸魔
衆讚誦妙偈歎如來德釋提桓因白摩耶言
如來出世雄爲報恩故來至此處摩耶夫人聞
佛已來遣諸天女持諸天寶及天伎樂曼陀
羅華在階道邊以迎世尊尔時如來舉足下
足無數宮殿一一宮殿五百化佛結跏趺坐
一一如來五百菩薩以爲侍者尔時五百分身

諸佛釋迦文入忉利天宮諸天歡喜而說此偈

毗婆尸佛 吉祥中尊 亦放光明 來至此處

尸棄如來 大吉祥尊 化身無數 來至此處

毗舍浮佛 放白毫光 普照一切 來至此處

拘樓孫佛 面門出光 照十方界 來至此處

拘那含佛 化身無數 放大光明 來至此處

迦葉世尊 身如寶臺 足步虛空 來至此處

釋迦牟尼 分身五百 無數化佛 照曜一切

來至此處 彌勒菩薩 賢劫尊者 亦放光明

當至此處 此處吉祥 安隱無為 諸佛所遊

牟尼生地 名涅槃窟 慧者智度

今時世尊入忉利宮即放眉間白毫相光其

光化作七寶大蓋覆摩耶上七寶飾牀奉摩
耶坐佛母摩耶見佛入宮合掌恭敬為佛作
禮五百化佛一時伸手諸天扶持不聽禮敬
八萬四千諸化如來皆悉起立尔時摩耶夫
人宮中自然涌出五百億光此光明中有大
寶臺一一臺上有十方佛如是諸佛自說名
字安慰佛母東方善德佛持妙寶華散釋迦
牟尼及摩耶上化成華蓋此華蓋中百億化
佛合掌起立問訊佛母南方栴檀德佛持寶
蓮華散釋迦牟尼及散佛母上化成華蓋於
華蓋中無數化佛合掌起立問訊佛母西方
無量明佛以寶蓮華散釋迦牟尼及佛母上

化成華蓋無數化佛合掌起立問訊佛母北方相德佛以寶蓮華散釋迦牟尼及佛母上化成華蓋無數化佛合掌起立問訊佛母東方無優德佛西南方寶施佛西北方華德佛東北方三乘行佛上方廣衆德佛下方明德佛如是等佛各以寶華散釋迦牟尼佛上及散佛母化成華蓋一一蓋中無數化佛合掌起立問訊佛母時忉利宮滿中化佛佛母摩耶頂上自然出衆供具無量幢幡供養諸佛時幢幡中有妙音聲讚佛讚法讚比丘僧佛告阿難是名如來從閻浮提昇忉利宮色相光明諸神化事佛滅度後佛諸弟子若如

是觀是名正觀若異觀者名爲邪觀作此觀者除一億劫生死之罪臨命終時見十方佛必生他方淨佛國土佛告阿難汝持是語爲未來世諸衆生等當廣宣說聞此語者思是義者當知是人十方諸佛之所覆護命終必當生諸佛前佛告父王云何名如來從忉利天下閻浮提時光相變應我初下時無數天子百千天女侍從世尊獨見一佛圓光一尋放千光明足步虛空躡階而下時佛光中七佛像現從佛光出導佛前行時優填王戀慕世尊鑄金爲像聞佛當下象載金像來迎世尊蓮華色比丘尼化作瑠璃山結跏趺坐在

山窟中無量供具奉迎世尊。爾時金像從象
上下猶如生佛。足步虛空。足下雨華。亦放光
明。來迎世尊。時鑄金像。合掌。叉手。爲佛作禮。
爾時世尊亦復長跪。合掌向像。時虛空中百
千化佛亦皆合掌。長跪向像。爾時世尊而語
像言。汝於來世。大作佛事。我滅度後。我諸弟
子。以付囑汝。空中化佛異口同音。咸作是言。
若有衆生。於佛滅後。造立形像。幡華。衆香。持
用供養。是人來世。必得念佛。清淨三昧。若有
衆生。知佛下時。種種相貌。繫念思惟。必自得
見佛。佛告阿難。佛滅度後。佛諸弟子。知佛如
來。下忉利天。及見佛像。除却千劫極重惡業。

如是觀者名為正觀若異觀者名為邪觀

觀佛三昧海經卷第六

覆

癰

創

文

奢

籥

邠

坵

布

巾

及

驅

擯

丘上

俱反下

必刃反

吹音

虛

竇

音

捷

直

追

輦

余

預

弊

祀

祭

關

下

時

反

作

鑰

王

下

直

知

反

及

反

反

反

